

Gou Caeuq Duzciengh Gvaq Ngoenz Ndeu

我和大象过一天

Gyanghaet, gou caeuq duzciengh itheij bae ndaw ndoengfaex laux vat bauj.

Gou dawz fagcanj、heiyouz、dajhojgih, gwih hwnj baihlaeng duzciengh, duzciengh cwxcaih dwk byaij bae coh ndoengfaex. Duzciengh seiz mbouj seiz yungh ndaengraez de mbaet makndoeng hawj gou gwn, gou gwn ndaej feihdauh dangqmaz, duzciengh hix gwn ndaej dungxraeng liux, aen dungx de bongzbwdbwd, haisim raixcaix ha!

Dou laebdaeb byaij, mbouj rox mbouj nyinh couh daeuj daengz daej aen gamj ndeu, duzciengh yungh ndaeng nyounyouq gwnzdieg naeuz: “Gizneix itdingh miz gim, raeuz vat ba.” Yienghneix dou couh hainduj vat lo. Duzciengh yungh ndaek gahung de lumj diuz saeu hung haenx baez daemh, gwnzdieg loemq roengz aen congh hung ndeu, aen congh miz bak mij laeg, gou hix yungh fagcanj vat namh. Sawqmwh ronghmyanmyan, raen miz ndaek gim ndeu, de beij duzciengh lij hungsang, aen bak gig hung, lwgda lumj aen dienhaeng nei, gwnzgyaeuj lij



miz gaeu, gwnz ndaeng maj miz oen, dwglau dangqmaz. De hujfwdfwd dwk naeuz: “Caen ndei lo! Aen dungx gou cingq iek, gou yaek gwn sou bae.” Gou caemdingh dwk dawz heiyouz hawj de, naeuz: “Neix dwg gaiqgwn ceiq ndei gwn, ndoet song sam gaemz couh imq lo.” Doeklaeng duz-gvaiqgim sikhaek ndoet gwn heiyouz, gou couh heuh duzciengh dawz dajhojgih coemh heiyouz, duzciengh diemj dawz dajhojgih vut coh duz-gvaiqgim, duzgvaiqgim gwnz ndang deng feiz coemh lo, de youq gwnzdieg rouxringx, yaep ndeu de couh mbouj doengh saek di lo, gou caeuq duzciengh hix sikhaek dauqma ranz lo.

Ngoenzhaenx, gou caeuq duzciengh vat mbouj ndaej gijmaz bauj, dauq dwg bungq gvaq baez yung, yiemj ndeu, baezlaeng lij dwg lauxsaed youq ranz ba.

(Sanglinz Yen Dafungh Cin Cunghsindh Hagdangz seiq nienzgaep Cinz Cihsan boux lauxsae son'gyauq: Mungz Cwngzgen)

Gyaez, Couh Youq Henz Gou

爱，就在我身边

Haetromh, gaenjgip gwn haeuxhaet sat, gou yaek bae aen ban son suyoj boujhag goenggoq, caeuq daxmeh doxcaez roengz laeuz. Gou yawjraen ndaw daeh daxmeh miz aen liengj ndeu, gou ngiengx gyaeuj yawjyawj mbwn, ndit ronghsag, yienghneix, gou ngeizvaeg naeuz: Yi? Mbwn baenzneix gvengq, daxmeh vihmaz lij dawz liengj ne?

Gig vaiq, dou couh daengz aen ban son saw lo, daxmeh daiq gou bae roxnaj gyoengq lauxsae aen ban son saw gonq, yienzhaeuh gyau gou hawj Lij lauxsae couh lizhai lo. Boux Lij lauxsae neix yawj hwnjbae nienzgeij mbouj laux, byoem ndaemndat, fouq lwgda hunghwd, saw-dikdik, yawj hwnjbae unqswnh dangqmaz. Mwh hwnjdangz, de cam dou gijmaz dwg gyaez ne? Ndw gyausiz yaepyet nauhyied hwnjdaej lo, aen vwndiz neix gyoengq doengzhag cungj doxyaeng huhu. Hoeng gvaq liux faen cung ndeu, gvaq liux song faen cung……Cix mbouj miz vunz ndwn hwnjdaej hoizdap aen vwndiz neix.

Doeklaeng, Lij lauxsae lwnh dou, gyaez couh youq henz gyoengqdou, de ciengzseiz bienq yiengh, seizseiz youq henz gyoengqdou, de mizseiz dwg coenz vahdaengq genjdanh ndeu, mizseiz dwg mbat lumhlah unqswnh ndeu, mizseiz lijdwg gij mboendamz ndaw ndwen-ngoenz……

Dingq vah lauxsae liux, ndaw gyausiz sikhaek caemrwrwd, ndawsim gou cungj dwg ngeizvaeg.

Couh yienghneix, aen singhgiz ndeu liux, ndaw uk gou lij seiz mbouj seiz naemj song aen vwndiz, aen daih'it couhdwg vihmaz daxmeh ngoenznaengz cungj dawz aen liengj ndeu ne? Aen



vwndiz daihngaih dwg gij gyaez henz gou dauqdaej dwg cungj lawz?

Ngoenz ndeu, daxmeh cieq gou dauq ranz byaij youq gwnz roen, dan dingqny geij sing “maenjrumrum”, mbwn doek fwn hung lo, mwh gou nyinhnaeuz yaek deng fwn rwed baenz gaeq doek raemx, daxmeh guhmuengz dawz liengj ndaw daeh okdaej, gang liengj. Dauq daengz ranz, gwnz ndang gou mbouj miz saek di raemxfwn, hoeng buenq mbaq daxmeh gaenq dumzcatcat. Sikhaek, gou rox lo, daxmeh itcig yungh gij fuengsik de laeglemx gyaez gou, gij gyaez de mbouj miz sing'yaem, cix seizseiz hopheux youq henz gou.

Gyaez, couh youq henz dou, seizseiz miz. Cigsoh daengz ngoenz ndeu, mwngz sawqmwh roxnaj, gij gyaez henz mwngz, dwg baenzhaenx hungmbwk!

(Sanhdungh Swngj Gauhcingh Yen Gauhcwngz Cin Fanzlinz Siujyoz Fanz Gyahyiz bouxhoiz: Cwz Fanghdingz)

Va'ngaeux Mbanjranz

家乡的荷花

Binaengz ndwencaet, daemzngaeux mbanjranz miz gak cungj va'ngaeux hai hoengh, saekhau, saeknding, saekmaeq caeuq saekhenj……Mwh banhaet gij ndit saekgim daihdaez ciuq youq gwnz daemzngaeux, va'ngaeux engq hom lo, mbawngaeux hix engq heu lo.

Ndwencaet dwg mwh va'ngaeux hai ceiq hoengh, gyoengqde miz mbanj lijdwg valup, miz mbanj bemhbongz yaek hai, miz mbanj gaenq hai hoengh, loh ok simva saekhenjgim, sangreux gyaeunde. Sawqmwh, duz biengzbeih iq saeknding ndeu mbin gvaqdaej, caep youq gwnz valup soemsengseng haenx, couh lumj coenz sei Yangz Vanlij nei: “Go'ngaeux ngamq loh gyaeuj soemraeh, caeux miz biengzbeih caep baihgwnz.” Raq rumz baed gvaq, mbawngaeux youq gyang daemz loengzlaenh, couh lumj raemxlangh yawj mbouj daengz henz nei.

Fwn ndwencaet naeuz daengz couh daengz, gwnz mbwn doek fwnraq naed hung lumj naed duh nei. Gou buet daengz henz daemzngaeux, mbaet mbawngaeux ndeu dawz hwnj gwnz gyaeuj bae, ndoj youq laj aen “liengj iq” saekheu gwn rongzcehngaeux, yawjngonz fwn doek. Naed fwn doek youq gwnz mbawngaeux, danz ok hot go angqyangz ndeu……Hoengheiq ndei dangqmaz, ndawde miz di hom va'ngaeux, caen ndei nyouq ha!

Gou gyaez mbanjranz gou, engq gyaez va'ngaeux mbanj-ranz.

(Gveigangj Si Hoz-cwngz Siujyoz Cinz Linz)

